

08/04/2001

Islam: Carilah titik persamaan

TIDAK bolehkah orang Islam bersatu dan bersama dalam hal-hal ibadah, pendidikan dan hukum-hakam mengenai agama? Umat Islam percaya bahawa Islam adalah agama paling sempurna. Tetapi mengapa kita terus bertelagah, malah bermusuhan, meskipun dalam perkara kecil seperti penggunaan masjid? Pada hal masjid adalah tempat suci, mulia, lambang keagungan dan perpaduan umat.

Dalam setiap ucapan menyambut hari-hari kebesaran Islam, Dr Mahathir menegaskan bahawa sejarah memperlihatkan kejatuhan umat Islam adalah kerana tidak boleh bermuafakat menyatukan kekuatan. Lagi sekali perkara ini ditegaskan dalam ucapan menyambut Maal Hijrah tahun ini. Barangkali ada yang tidak suka kepada Dr Mahathir kerana masalah politik. Tetapi bukankah apa yang dikatakan itu suatu kebenaran.

Alim ulama dan cerdik pandai Islam - khususnya Melayu - tentulah boleh duduk bersama mencari titik persamaan dalam aspek-aspek agama yang boleh dikerjakan bersama. Lupakan Dr Mahathir, Ustaz Fadzil Nor dan Tok Guru Haji Nik Aziz. Lupakanlah sebentar cita-cita politik parti yang kita sokong. Tumpukan kepada amalan ibadah, pendidikan dan hukum-hakam agama. Kita mempunyai cukup keahlian dalam bidang-bidang ini.

Malu amatlah rasanya kepada penganut-penganut agama lain di negara kita ini. Tidak habis-habis kita bertelagah dan tuduh-menuduh, umpamanya tentang penggunaan masjid, kematian dan perkahwinan. Tidak juga habis-habis kita bercakap tentang kafir mengkafir.

Kita mendabik dada bahawa orang Islam boleh dan patut menjadi pemimpin negara ini. Sedangkan mengurus masjid pun tak terdaya!